

Karikiriki yo o katisang baloi

E kwadilwe ke Robert Muponde | E tshwantshitswe ke Elizabeth Sparg



Go kile ga bo go na le mosadimogolo yo o neng a dula a le nosi mo ntlwaneng e e neng e le mo maotong a thabana. Baloi ba ne ba kgona go mo etela bosigo bongwe le bongwe. Ba ne ba mo etela ba palame bophiri. Bophiri bano ba ne ba tshubetswe tsela ke merubisi ka matlho a yona a a phatshimang a magolo.

Baloi bano ba ne ba lala ba dira medumo e e tshosang ka gale le go itaagana mo lebating go fitlhelela ka nako ya mahube. Diphiri tsona di ne di lala di tshega bosigo jotlhe fa merubisi yona e tshatshamolola bojang mo marulelong. Baloi ba ne ba goa ka mantsewe a

magolo ba re: “Ke kgale re sa palame mokwatla wa mosadimogolo. Tswaya!”

Mosadimogolo o ne a simolola go lela le go rapela badimo gore ba mo sireletse. Baloi ba ne ba dira moletlo o mogolo mo patlelong ya gagwe. Ba ne ba gagolaka bontsi jwa diaparo tsa bona ba binela fa pele ga lebati la gagwe. Ba tsamaile fela pele ga mahube. A baloi ba ba setlhogo!

Mosadimogolo a utlwa sengwe se mo loma mo monwaneng wa kgonojwe.

E ne e le legotlo le le agang le tsena ka phatlha e e mo loboteng. Mosadimogolo ga a bolo go le tshelera botlhole go le bolaya. A legotlo le le tlhotseng ruri!

O ne a phamola setlhako sa gagwe go leka go le kolopa, mme pele a ka dira jalo a utlwa legotlo le re: “Mosadimogolo yo o rategang, ke tlile go go loma monwana wa kgonojwe ka kagiso. Ga o bolo go tlhobaela masigo a le mantsi. Ga o tlhole o kgona le go ya masimo. O tlile go bolawa ke tlala fa ke sa go thuse. Mosadimogolo yo o rategang, ke na le kakanyo!”

Ka a ne a batla thuso, a kopa legotlo go tthalosa.



E ne ya re ka lengwe la malatsi ke ntse ke kaila kaila mo logageng ka bona motlhala o mogolo wa ga Karikiriki, mmolai yo o gakgamatsang wa moloi,” ga bua legotlo.

A raya mosadimogolo a re, “O tsene mo logageng bosigo o le mongwe o rotse ditlhako. Fa o dira jalo o goe thata gararo o ntse o bina fa o tswela kwa ntle.”



Ka jalo mosadimogolo a etela logaga mme a dira se legotlo le se mmoleletseng. O ne a goa, “Karikiriki! Karikiriki! Karikiriki!

Ya re fa a tswa mo logageng a utlwa mosito wa dinao tsa motho a mo setse morago. A le botsa phokojwe. Dinao tse di mo setseng morago le tsona tsa tsholetsa lebelo. Fa a leba kwa morago, mosadimogolo a bona dinao di mo setse morago!

Dinao tse dikgolo tseo tsa ema kwa ntle ga ntlwana ya gagwe moo legotlo le neng le mo letile gona. “Dinao fela? Ke Karikiriki,” ga tlhalosa legotlo.

Bosigo jwa tla. Baloi ba goeletsa: “Ke bogologolo tota re sa palame mokwatla wa mosadimogolo!”

Ba simolola go itaya lebati.

Ka ponyo ya leitlho, Karikiriki a tla a taboga go tswa mo a neng a iphitlhile gona mo meriting. Karikiriki a raga baloi ditlhogo mme ba wela fa fatshe, ba idibala.

“O seka wa ba bolaya pele!” mosadimogolo a bua ka lentswe le le kwa godimo. O ne a batla gore baloi ba ye go mo tlhagoletla kwa masimong ka jaana e ne e le ka ntlha ya bona gore mofero o bo o hupeditse dijalo. “Mme fa ba gana o ba bolaye,” a laela jalo.

Baloi ba ba tshwerweng bano ba dumela go tlhagola kwa masimong. Ba ne ba ka dirang tota? Ba ne ba dira

bosigo fela. Go dira motshegare go ne go sa ba siamela, e ne e le nako ya bona ya go robala. Gape ba ne ba na le mokgwa wa go apola diaparo, ka jalo bosigo e ne e le yona nako e e neng e ba siametse.

Mosadimogolo o ne a itumetse. “Legotlo,” ga bitsa mosadimogolo, “ka jaana o bolokile botshelo jwa me, ga nkitla ke tlhola ke go tshelela botlhole. Fa ke sena go roba kwa masimo ke tlaa go fa kgetse ya mmopo.”

Legotlo la tshega tshega le itumetse. “Ke tlaa go loma monwana wa kgonojwe jaaka ke ne ke tlwaetse, mosadimogolo yo o rategang!”

Dinao tsa ga Karikiriki di ne tsa bina ka boitumelo. Baloi ba ba hutsafetseng ba ne ba tsaya dipetlwana mme Karikiriki a ba thiba go ya masimo. Diphiri tse di hupileng tedu le merubisi tsona? Di ne tsa boela mo sekgweng kwa di tswang gona.



Karikiriki yo o katisang baloi

E kwadilwe ke Robert Muponde • E tshwantshitswe ke Elizabeth Sparg

Megopolo e re ka buang ka yona

A o akanya gore kotlhao ya moloji e ne e siame? Goreng o re e ne e siame/e ne e sa siama?

O akanyang ka ditshwantsho tse di dirisitsweng ke mokwadi?

O akanya gore mogaka mo leinaneng leno ke mang? Ke ka ntlhayang fa o tlhophile motho yono?



Se se bonwang ka matlho

Ke karolo efe ya leinane leno e o e fitlhelang e tshosa thata? Kwala mokwalo ono mo tsebeng e kgolo ya pampiri. Terowa ditshwantsho gaufi le mokwalo tse di bontshang se se kwadilweng.



Go Bala

Ke dikgang dife tse dingwe tse o di badileng tse di nang le baloi, bodimo, diphiri le/kgotsa merubisi? O ka kgona go bona ditori tse dingwe tsa Nal'ibali fano: www.nalibali.org.story-resources. Tlhopha leinane le le lengwe le o ka le balang. Leinane leno le tswana jang e bile le farologana jang le *Karikiriki yo o katisang baloi*?




Go Kwala

Kwala tshobokanyo ya leinane leno. Kwala le tshobokanyo e khutshwane o bo o tlhalose gore ke ka ntlhayang fa o ka buelela kgotsa o ka se buelele gore babadi ba bangwe ba ba lekanang le wena kgotsa ba babotlana mo go wena ba e bale.



Botaki

Dirisa dipoleite tsa pampiri kgotsa dikhateboto, pente le thudi go dira di-mask tse di tla tsenngwang ke badiragatsi ba ba mo leinaneng leno.



Tiragatso

Tshameka leinane la se se diregang mo kgannyeng eno o dirisa di-mask tse o di dirileng.

